



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

50. Kalenderwoche – ab 12. Dezember 2010

Schon gediehnd?

Nee, werglisch - da hädde doch e Offschrei des Endsedzens dursch das ganze Land gehn missn! Dor Freiherr von un zu Guddnbersch will de Wehrbflischd abschaffn. Ab näschesdes Jahr im Juli soll se schon ausgesedzd wern. Also, das heeßd, da wern keene neun wehrbflischdischn Kerle eingezochn! Das is doch... - nee, de ledzde Basdion dor Männlichkeid wird da niedorgerissn! De ledzde Zufluchdschdäde, wo Mann noch e Mann sein durfde! Ohne Müsli un Biomarmelade! Ohne Yoga un Bachblidendherapie!

Als däds bloß um de Landesvordeidischung gehn!? Nee, es dud um een Bildungsbereisch gehn!

Guhd, es war ja schon in de ledzdn Jahre erlaubd, dass ooch Fraun in dor Bundeswehr midmachten durfdn, abor die sinn ja nisch wehrbflischdisch gewähsn, die ham ja nisch so de Grundausbildung gehabbd zusamm mid de männlischn Wehrbflischdischn. Die sinn ja doch nähr fiehr sisch gebliehm. Das had dor männlischn Node dor Bundeswähr nisch sähr geschaded. De wehrbflischdischn Kerle sinn ordnungsgemäß von männliche Unnor-un Oberoffiziere ausgebildet wordn. Un erzochn wordn!

Un off das ledzdore duds ja ankomm! Wo annersch, als wie bei dor Bundeswehr kann heidzudaache noch e jungor Kerl lern, was e Mann is?! Wo dud sisch eene Schdurbahn findn, wo de von eim Unnoroffizier driebor gescheuschd wern kannsd? Mid nedde Worde un nodfalls ooch ma mid eim kleen Arschdridd? Wo dusde sonsd de Romandig eenes Feldlachors im Windormannövor findn? Wo lernsde besser dei eisches Grab schaufeln, als wie wenn de eene Schüdzmulde ausbuddln mussd? Wo lernsde Schnauzehaldn, ooch wenn de was zu meggorn hasd?

Das is ja ooch bei dor Fahne so gewähsn.. - also, dazumals in dor ehemalischn! Da ham mir ja zur Volksarmee "Fahne" gesachd. Un da is das ooch so gewähsn, dass mor dord unnor Männorn war un zum Mann gewordn is. Grade ooch in dor Budz-un Fliggschdunde odor beim Kardofflschäl'n odor bei Schduhm-un Revierreinischung! Beddnbaun un Schbindordnung... - wo solln denne das nu de jung Kerle lern? Wenn de Bundeswehr das nisch mähr machn dud?

E deudschor Unnoroffizier is noch immor dor besde Lehrmeesdor fiehr de männliche Juchend gewähsn! Schon immor ham sich de Männer unnorschiedn in Gediende un Ungediende!

Un nu duds bald bloß noch Ungediende gähm. Vorbemblde Weischeior! Die jung Kerle wern dann nur noch von Fraun erzoch'n - von Kindesbeene an bis zur Volljährichkeid! Überall sin junge Kerle von Fraun förmlisch umzingeld! Daheeme sobiso! De Babas missn ja haubdsäschlich Geld ranschaffn. Abor ooch im Kinnorgardn odor in dor Schule... - wo solln denne junge Kerle midgrisch'n, wie e Mann is? Die vorweiblischn doch alle immor mähr! Das dud mor doch schon überall sähn! Nee, Diszebliehn un Gehorsam, Ordnung un Härde wern langsam ausschderm. Un das meene isch sogahr zu zäh'n Brozennd ganz in Ernsd!

Eduard Sachsenmeyer